

V.P Resigns

उपराश्ट्रपति जगदीप धनखड़ होरें स्वास्थ कारणें दे चलदे इस्तीफा दित्ता ऐ। राश्ट्रपति द्रोपदी मुर्मू होरें'गी लिखी दी चिट्ठी च धनखड़ होरें गलाया जे स्वास्थ सेवा गी प्राथमिकता देने ते मेडिकल सलाह दी पालमा करने लेई उनें फौरी तौरा पर भारत दे उपराश्ट्रपति पद शा इस्तीफा देई दित्ता ऐ। उनें अपने कार्यकाल दुरान राश्ट्रपति हुंदे अटूट सहयोग लेई उंदा आभार जताया। धनखड़ होरें प्रधानमंत्री नरेंद्र मोदी ते उन्दे मंत्री परिषद दे प्रति बी अपना आभार प्रगट कीता। उनें गलाया जे सब्बने सांसदेन शा उनेंगी जेड़ी गर्मजोशी, विश्वास ते प्यार मिलेआ ऐ, ओहू उन्दे चेत्ते च म्हेशां रौहग। धनखड़ होरें आखेआ जे इस महान लोकतंत्र च उपराश्ट्रपति दे रूप च हासल अनुभवे लेई ओहू बडे मते आभारी न।

<><><><><><>

HM-Drug Free

सेहत मंत्री सकीना इत्तू होरें इस गल्ला पर जोर दित्ता ऐ जे धार्मिक नेताएं, सरकारी मलाजमें, कनून नाफिज करोआने आहली एजेंसिएं, समुदाय दे सरबन्धी धड़ें ते नागरिकें दे सांझे जत्ते कन्नै समाज थवां नशे दी माड़ी कवैतू गी खत्म कीता जाई सकदा ऐ। एहू गल्ल मंत्री होरें श्रीनगर दे इक सरकारी कॉलेज च आयोजित इक रोजा सेमीनार गी संबोधित करदे होई आकखी। अपने संबोधन च सकीना होरें इस गल्ला पर जोर पाया जे समाज दा हर व्यक्ति युवाएं च बददी इस माड़ी कवैतू गी खत्म करने च महत्व आहली भूमिका निभाई सकदा ऐ। मंत्री होरें आखेआ जे सरकार इक्कली इस कवैतू खलाफ लड़ाई नेई लड़ी सकदी।

<><><><><><>

CS-ABP

जम्मू-कश्मीर च भारत नेट प्रोग्राम दी नमें सिरिआ अमलावरी यकीनी करने लेई मुख सचिव अटल डुल्लू ते टेलीकॉम दे सचिव नीरज मित्तल होरें इक बैठक दी सहअध्यक्षता कीती। बैठक दा मकसद इंटरनेट जां फी तकनीकी तौरा पर पिच्छे रेही गेदे ग्रामीण इलाकें गी एहदे कन्नै जोड़ियै बित्थ गी पूरना ऐ की जे शैहरा च ब्राडबैंड ते इंटरनेट आहली सुविधाएं दी उपलब्धता 33 फीसद तगर ऐ जेदे मुकाबले ग्रामीण इलाकें च एहू आंकड़ा छड़ा 2 फीसद ऐ। इसै कमी गी पूरा करने लेई मुख सचिव होरें इस प्रोग्राम दी महत्ता पर लो पाई। उनें इस प्रोग्राम दी समेंसिर अमलावरी यकीनी बनाने लेई प्रशासन दी तरफा पूरा-पूरा सहयोग देने दा भरोसा दोआया।

<><><><><><>

Earthquake

हरियाणा च भूंचाल आने दे बाद दिल्ली च बी भूंचाल दे झटके मसूस कीते गए। राश्ट्री भूंचाल विज्ञान केंद्र दे आंकड़ें मताबक इस भूंचाल दी तीव्रता रिक्टर पैमाने पर 3.2 रेई ते एहू भूंचाल बडुलै 6 बजे दे कोलकश आया। फरीदाबाद गी एहदा केंद्र आखेआ जारदा ऐ। हुनै तोड़ी कुसै बी चीज या मनुक्खी नुकसान दी कोई खबर नेई ऐ।

<><><><><><>

Op.Sindoor

संसद दी कार्यवाइयें सरबन्धी सलाहकार कमेटी नै लोकसभा च आपरेशन सिंदूर उप्पर चर्चा करने दा फैसला लैता ऐ। आपरेशन सिंदूर सेना आसेआ पहलगाम आतंकी हमले दा मुंहत्रोड़ परता हा। इस मुद्दे उप्पर चर्चा लेई 16 घंटे दी समें सीमा तय कीती गेई ऐ। एहदे अलावा हेठले सदन च इंकम टास्क बिल 2025 लेई 12 घंटे ते राज्यसभा च 9 घंटे दी बैहस दा समें तय कीता गेआ ऐ।

<><><><><><>

Amarnath-Yatra

जम्मू दे भगवती नगर आहले आधार शिविर थवां 3 ज्हार 536 श्रद्धालुएं दा 20मां जत्था सख्त सुरक्षा बंदोबस्तें हेठ श्री अमरनाथ जी दी जात्तरा लेइ, घाटी आस्तै खाना होआ। एह श्रद्धालु 132 गड्डिएं दे काफले च सोआर होइयै अगड़ी जात्तरा लेई खाना होए। इन्दे च 2 ज्हार 601 मर्द, 822 महिलां, 11 बच्चे, 86 साधु ते 16 साध्वियां शामिल हियां। इन्दे चा इक ज्हार 250 श्रद्धालु बालटाल लेई ते 2 ज्हार 286 पहलगाम लेई खाना होए।

<><><><><><>

Tawi-Aarti

कल संझा भारी बरखा दे बावजूद बड़ी बह गिनतरी च लोक सूर्य पुत्री तवी घाट च रोजाना होने आहली तवी आरती लेई किट्टे होए। इस मौके पर लोकें दीए बालिए मंत्रें दा उच्चारण करदे होई तवी दे कंडे बड़े उत्साह कनै तवी आरती च हिस्सा लैता। उन्दे जोश च कोई कमी नेई ही। श्री अमरनाथ जी दी जात्तरा दे शुरू होने पर तवी आरती गी शुरू कीता गेआ जेड़ी रोजाना सूर्य पुत्री देवी घाट पर संझा लै आयोजित कीती जंदी ऐ।

<><><><><><>

DC Jammu TB Mukht

जम्मू दे डिप्टी कमिशनर सचिन कुमार वैश्या होरें जिले च T.B मुक्त भारत अभियान दी अमलावरी दा जायजा लैता। उनें मुतल्लका अफसरें गी आखेआ जे ओह जांच ते इलाज आहली कार्रवाई गी तेज करन ते मुख करी ध्यान उनें लोकें पर देन जेड़े एहदी तौले चपेट च आई सकदे न जियां वरिष्ठ नागरिक। शराब ते तम्बाकू दा सेवन करने आहले, एच.आ.ई.वी पाजिटिव व्यक्ति, मधुमेह दे मरीज ते समाजी तौर पर पछड़े दे लोक, डिप्टी कमिशनर होरें संदिग्ध मामले दी ताल ते उन्दे तौले इलाज पर बल दितता। उनें सब्बनें बशकार तालमेल खास करी समाज कल्याण ते ग्रामीण विकास मैहकमें बशकार आपसी तालमेल पर जोर पाया तां जे लोकें च बेहतर ढंगे सिर जागरूकता पैदा कीती जाई सकै।

<><><><><><>